

आकाशवाणी जयपुर-अजमेर

दिनांक 23.05.2024

समय: 18.50 बजे

प्रादेशिक समाचार

- लोकसभा चुनाव रा छठां चरण रो प्रचार आज व्ह्यो पूरण-मतदान शनिवार ने ।
- भगवान गौतम बुद्ध री जयंती बुद्ध पूर्णिमा देशभर मांय रीत मुजब उमाव रे साथे मनायी जावे-प्रदेश मांय ई धार्मिक आयोजनां री धूम ।
- राज्य मांय तेज गर्मी अर लू रे कारण जिन्दगी माथे असर- आवता 4-5 दिन प्रदेश रा 17 ऊं बत्ती जिला मांय रेड अलर्ट काडी ज्यो ।

अर

- प्रदेश मांय वॉटर होल पद्धति ऊं करी जाय री है जंगली जीवां री गणना-काले सवारां आठ बज्यां ताई व्हेला गिणती ।

000

लोकसभा चुनाव रा छठां चरण रो प्रचार आज सिंज्यां थम ग्यो । ई चरण मांय आठ राज्यां रा 58 चुनाव हलकां मांय 25 मई ने वोट पडेला । इण मांय उत्तर प्रदेश री 14, हरियाणा री सगली दस सीट, बिहार अर पश्चिम बंगाल री आठ-आठ, दिल्ली री सगली सात, ओडिसा री छः, झारखण्ड री चार अर जम्मू-कश्मीर री एक सीट माथे वोट पडेला । आ सगळां चुनाव हलकां मांय कुल 8 सौ 89 उम्मीदवार मैदान मांय है ।

000

देश मांय लारला 18 साल रे मुकाबले, ई साल मई मीना मांय रूजगार अर निर्यात मांय रिकॉर्ड बढवार दर्ज करी ज्यी है । एचएसबीसी फ्लैश क्रय प्रबंधक सूचकांक मुजब, भारत जुलाई 2010 ऊं निजू हलका रा उत्पादन मांय तीजी सब ऊं बत्ती बढवार वाळो देश बण ग्यो है । बिकवाळी अर उत्पादन-दोन्यू मामलां मांय विनिर्माण हलको बरोबर प्रगति कर रियो है, फौरु ई भेळा आर्थिक सशक्तिकरण रो खास कारण सेवा हलको मजबूत वेणो है । एच.एस.बी.सी. रा भारत रा खास अर्थशास्त्री प्रांजुल भंडारी कह्यो के दोन्यू हलकां सारु निर्यात मांय बढवार व्ही है ।

000

भगवान गौतम बुद्ध री जयंती बुद्ध पूर्णिमा देशभर मांय रीत मुजब उमाव रे साथै मनायी जावे। ई मौके राष्ट्रपति द्रौपदी मुर्मू अर उपराष्ट्रपति जगदीप धनखड़ देशवासियां ने शुभकामनावां दी है। राष्ट्रपति कह्यो के भगवान बुद्ध री सहिष्णुता अर सदाचार सगळा सारू प्रेरणाजोग है। उपराष्ट्रपति आप रा संदेश मांय कह्यो के भगवान बुद्ध री शिक्षावां सगळा रो मार्ग सुझावे है। बुद्ध पूर्णिमा रे मौके प्रदेश मांय न्यारी-न्यारी ठौड़ां भगवान बुद्ध ने श्रद्धा रे साथे याद कर्या जावे। बुद्ध पूर्णिमा ने बैशाख पूर्णिमा अर पीपळ पूनम रा रूप मांय मनायी जावे है। ई मौके मंदिरा मांय तडके सवारा ऊं सिरधालुआं रो तांतो लाग्यो रह्यो। जयपुर रा पवित्र गलता सरोवर मांय सिरधालू स्नान कर ने दान-पुन कर्यो। झालावाड़ रा झालरापाटन मांय चंद्रभागा नदी माथे सवारा ऊं ई भक्त पवित्र डुबकी लगा र पूजा अर्चना कर रिया है। वठे ई करडी गर्मी रे कारण जिला रा गौमती सागर माथे भरीजण वाळो पशु मेळो टाळ दीरीज्यो है।

गांवांई हलकां मांय मंगळ आयोजन व्हे रह्या है अर केई ठौड़ां भेळां ब्याह जळसां ई व्हे रह्या है। पीपळ पूनम रे मौके अबूझ सावो होवण रे कारण अंदेशा वाळां बालपणा रा ब्याह रोकण सारू प्रशासन कानी ऊं सावचेती बरती जाय री है। केकडी रा सरवाड़ मांय भील बस्ती मांय आज विधिक जागरूकता शिविर लगायी ज्यो। शिविर मांय आया लोगां ने बाळकां रा ब्याहव अर इण ऊं होवण वाळां बुरा नतीजां रा बारा मांय जाणकारी दीरीजी। जैसलमेर मांय नामी तीर्थ बैशाखी मांय ई आया श्रिद्धालुआं पवित्र सरोवर मांय डुबकी लगाई। पैली रा बगत मांय बैशाखी ने जैसलमेर रो हरिद्वार मान्यो जावतो हो। शाहपुरा मांय अमर शहीद कुंवर प्रताप सिंह बारहठ री 132 वी जयंती ने बलिदान दिवस रा रूप मांय मनायी जावे। ई मौके लोगां वां ने श्रिद्धाजलि दी।

000

राज्य मांय अजै ई करडी गर्मी अर लू रो दौर चाले। मौसम केन्द्र, जयपुर ऊं मिली जाणकारी मुजब आवता दो-तीन दिन मांय तापमान मांय 2 ऊं 3 डिग्री सेल्सियस री बढवार रो अंदाजो है। इण रे साथै ई कठे-कठे ई तेज लू चालण अर रात री बगत गरम लहर चालती रेहवण रा आसार है। मौसम मेहकमो आवता चार-पांच दिन प्रदेश रा 17 ऊं बत्ती जिला मांय गर्मी अर लू ने ले र रेड अलर्ट कड्यो है। ई बीचे लारला 24 घंटां मांय राज्य रा घणकरां हलकां प्रचंड गर्मी री फेट मांय रह्या। काले बाड़मेर मांय पारो 48 डिग्री सेल्सियस माथे पूग ग्यो। जैसलमेर, फलौदी, चूरू, जालौर, वनस्थली अर फतेहपुर मांय ई बत्ती रो तापमान 47 डिग्री सेल्सियस ऊं ऊपर दर्ज करी ज्यो। बीकानेर, जोधपुर, श्रीगंगानगर, कोटा, पिलानी, डूंगरपुर मांय बत्ती रो तापमान 46 डिग्री सेल्सियस ऊं ऊपर रियो। राजधानी जयपुर मांय पारो 45 दशमलव 4 डिग्री सेल्सियस दर्ज व्ह्यो। जयपुर रा सवाईमानसिंह अस्पताल मांय लू अर तापघात ने ले र करी ज्या मेडिकल बन्दोवस्त रो आज चिकित्सा मेहकमा री अतिरिक्त मुख्य सचिव शुभ्रा सिंह जायजो लियो। वणा अस्पताल प्रशासन ने कंटीजेंसी प्लान बणावण अर 7 दिन मांय सगळा बन्दोवस्त सुचारू करण रा निर्देश दिया।

वठे ई शहर री सब ऊं मोटी हिंगोनिया गऊशाळा मांय गौवंश ने गर्मी ऊं आराम देवण सारू नगर-निगम हैरिटेज कानी ऊं गायां माथे ठण्डा पाणी री फुहार छोड़ी जाय री है। साथै ई छाया सारू त्रिपाल ई लगाया जावे। भीलवाड़ा अर पाली मांय

तेज गर्मी ने देखता आज शहर रा न्यारा—न्यारा मार्गा माथे पाणी रो छिडकाव करी ज्यो। झालावाड मांय नगर—परिषद कानी ऊं खास चौरायां माथे प्याऊ रा बन्दोबस्त करी ज्या है। जोधपुर मांय ई तेज गर्मी रो दौर चालतो रह्यो। म्हाणा खबरनवीस बतायो के आज दिन मांय तेज गर्मी अर लू रे कारण बाजार सूनां निजर आया।

बाड़मेर मांय ई गर्मी रा तीखा तेवर होवण रे कारण जीन्दगी माथे असर पड़यो है। ज़िला प्रशासन कानी ऊं सड़कां माथे पाणी रो छिडकाव करी ज्यो। जैसलमेर मांय नगर परिषद राहगीरां री सुविधा सारू तम्बू लगाया है अर ठण्डा पाणी रा बन्दोबस्त करी ज्या है। बांसवाड़ा मांय तेज गर्मी ने ध्यान मांय राखता चिकित्सा मेहकमो आप रा कार्मिका री छुट्टियां टाळ दी है। सर्वाईमाधोपुर ज़िला मांय करडी गर्मी ने देखता ज़िला प्रशासन पीवण रा पाणी री सप्लाई री समीक्षा कर ने चाइजता पीवण रा पाणी री सप्लाई तैय करण रा निर्देश दिया है। वठे ई केकडी मांय जिनावरां अर पखेरुआं ने लू अर तापघात ऊं बचावण सारू गोपालन मेहकमां कानी ऊं अभियान सरू व्हयो। अभियान रे दौरान पशु चिकित्सा संस्थानां अर गौशालावां मांय परिण्डा लगावण री सरूवात व्ही।

000

प्रदेश मांय आज ऊं वॉटर होल पद्धति ऊं जंगळी जीवां री गिणती करी जाय री है। आज सवारां आठ बज्या सरू व्ही आं गणना काले संवारां आठ बज्यां ताई चालती रहवेला। आ गणना सीतामाता अर बस्सी सेंचूरी, टेरिटोरियल एरिया अर मृग वन अर दूजी केई ठौड़ां माथे करी ज्या रही है। इण रे साथै ई वॉटर होल रे आरे—सारे मचान ई बणायी ज्यी है अर कैमरां ट्रेक लगायी ज्या है। जंगळात मेहकमां रा अहलकारां अर कर्मचारियां रे साथै जंगळी जीव प्रेमी ई प्रक्रिया मांय हिस्सो ले रह्या है। मुख्य वन्यजीव प्रतिपालक पी.के. उपाध्याय इण री निगराणी कर रह्या है। दौसा ज़िला मांय जंगळात मेहकमां री 30 ऊं बत्ती टीमां जंगळी जीवा री गणना मांय लागी है। ई दौरान बाघ, बघेरे, भालू, सियार अर हिरणां समेत अन्य जीवां री संख्या रो आंकलन कर्यो जावेला। ई सारू सीकर मांय 88, भीलवाड़ा मांय 49, जैसलमेर मांय 44 अर डूंगरपुर मांय 38 वॉटर होल बणायी ज्या है। भरतपुर रा केवलादेव राष्ट्रीय उद्यान मांय आज संवारां ऊं शुरु व्ही वन्यजीव गणना चाल री है और ब्यारो म्हाणा खबरनवीस ऊं—

विश्व कछुआ दिवस रे मौके सर्वाईमाधोपुर मांय कछुवां रा प्रजनन अर संरक्षण ने ले र गतिविधियां व्हे री है।

000

चार धाम यात्रा माथे जावण वाळां श्रिद्धालुआं सारू रजिस्ट्रेशन जरूरी कर दीरी ज्यो है। उत्तराखंड प्रशासन हर साल श्रद्धालुआं री बधती तादाद ने देखता सरल अर हिफाजती जात्रा तय करण सारू ओ फ़ैसलो लियो है। पवित्र धामां री जात्रा माथे जावण वाळां जातरियां ने जात्रा सरू करण ऊं पैला पंजीकरण करावणो जरूरी व्हेला

अर ओ फगत पंजीकरण री तारीख ने ई दर्शन करण री मंजूरी व्हेला। इण रे साथै ई प्रशासन 31 मई ताई वी.आई.पी. दरशण माथे पूरी तरह लोक लगा दी है।

000

प्रदेश मांय मिलावट रोकण सारू चलाया जा रह्या खास अभियान रा तैत खाद्य सुरक्षा अर औषधि नियंत्रण आयुक्त इकबाल खान री अगुवाई मांय आज केंद्रीय दल जयपुर री सूरजपोल अनाज मंडी परिसर रा एक निजी कंपनी रा गोदाम माथे कार्रवाई करी। ई दौरान पैली दीठ मांय तेल मांय मिलावट रो अंदेशो देखता 2 हजार 470 लीटर सरसू तेल सीज करी ज्यो है। अहलकार बतायो क तेल रा नमूने ले र केन्द्रीय जांच प्रयोगशाला भेजी ज्या है।

000